

Govor zamjenika predsjedavajućeg Predstavničkog doma Parlamentarne skupštine BiH dr. Denisa Bećirovića na 7. Kongresu dijaspore Bosne i Hercegovine

Sarajevo, 06. juni 2014.

"Dame i gospodo, dragi prijatelji,

Izuzetna mi je čast obratiti vam se u uvodnom dijelu 7. kongresa dijaspore Bosne i Hercegovine, skupa predstavnika građana Bosne i Hercegovine iz više desetina zemalja koji nikada nisu zaboravili ko su, šta su i odakle potiču.

Na samom početku želim reći da sam upoznat s vašim brojnim akcijama pomoći područjima pogođenim prirodnom katastrofom. Za takve humane geste, kao i za sve što ste učinili za Bosnu i Hercegovinu u prethodnim godinama i decenijama zaslužujete našu zahvalnost i poštovanje.

Svima je dobro poznato da je Bosna i Hercegovina jedna od rijetkih zemalja koja nije zakonski uredila poziciju svoje dijaspore. Osim toga, naša zemlja već decenijama nema ni državnu strategiju, ni državni akcioni plan za uključivanje dijaspore u vlastiti razvoj. Kao predlagač inicijative za usvajanje Zakona o dijaspori, pokušao sam prošle godine pomoći da se na državnom nivou uredi odnos Bosne i Hercegovine i njenih građana koji žive izvan domovine. Marljivo je rađeno i s ekspertima iz dijaspore, od kojih neke vidim i danas u ovoj sali. Tekst inicijative je došao pred poslanike, dobio je ubjedljivu opću većinu, ali je oboren zloupotrebom instituta entitetskog glasanja iz bh. entiteta Republika Srpska. Inicijativa za usvajanje Zakona o dijaspori doživjela je sudbinu kao i preko 300 drugih zakona koji su oboreni entitetskim glasanjem. Međutim, mi se nikada nećemo umoriti od borbe da ovo važno pitanje zakonski oblikujemo kao i druge razvijene države.

Moramo promijeniti stereotipe. Bosanskohercegovačka dijaspora nisu više samo ljudi koje prepoznamo kao prognanike i izbjeglice, niti je dijaspora zbir tri odvojena nacionalna korpusa. Nažalost, takva shvatanja su u pojedinim političkim krugovima u Bosni i Hercegovini još uvijek prisutna i na osnovu njih se često vuku pogrešni potezi. Treba zato u svim prilikama, pa i u ovoj, jasno potcrtati da je bosanskohercegovačka dijaspora armija dobronamjernih ljudi koji ovu zemlju čine ekonomski jačom i godišnje joj samo putem doznaka pošalju oko 3,5 milijarde KM ili oko 14 % GDP-ja. Dijaspora su, uz sve ostale, i hiljade ili desetine hiljada etabliranih, uspješnih privrednika,

univerzitetskih profesora, eksperata u različitim oblastima, uglednih kulturnih, javnih i sportskih radnika, poslanika po evropskim i vanevropskim parlamentima. Sve su to građani Bosne i Hercegovine koji žele i mogu povući ovu zemlju naprijed.

Poštovani građani Bosne i Hercegovine, dragi zemljaci,

Vrijeme je, definitivno, za podvlačenje crte i moj je utisak da je Kongres koji danas otvaramo pravo mjesto za najavu mobilizacije svih progresivno orijentiranih snaga i za slanje novih snažnih i nedvosmislenih poruka. Prirodna nesreća koja je pogodila Bosnu i Hercegovinu još jednom nas je opomenula da priroda ne poznaje nacionalne, vjerske, ideološke ili entitetske granice. Solidarnost i pomoć također su prešle vještački uspostavljene granice među ljudima iako još uvijek postoje snage koje se s tim ne mogu pomiriti. I sreća i nesreća su u ovoj zemlji zajedničke, zajedničke su nam i štete od prirodnih nepogoda i zajednički ćemo ih godinama morati sanirati. Destruktivne snage u zemlji moraju konačno spoznati da u Bosni i Hercegovini i tonemo i idemo naprijed samo zajedno.

Dame i gospodo,

Za ljude koji vole ovu zemlju ne postoji pitanje koje je politički, moralno i historijski važnije od pitanja očuvanja i razvoja države a njena ključna supstanca su naši ljudi, bez obzira na to žive li oni u Bosni i Hercegovini ili van nje.

Pitanje je: kako da Bosna i Hercegovina izdrži neviđene opstrukcije i osigura uslove svog daljnjeg razvoja? Postoje pojedinci, i takvih je do sada bilo mnogo, koji smatraju da je redoslijed vrijednosti sljedeći: vjera, nacija, stranka, država. Nažalost, najmanje je onih političkih djelatnika koji promišljaju, razumijevaju i shvataju bosanskohercegovačku opstojnost na način da očuvanje bosanske države vide kao uslov očuvanja i opstanka svih drugih identiteta. U zabludi su oni koji smatraju da se zaštitom isključivo vjerskog ili nacionalnog identiteta, zanemarujući zaštitu Bosne i Hercegovine kao države, adekvatno štite vjera i narod. Historijsko iskustvo govori da se samo državom i državnim aparatom mogu zaštititi nacionalna i duhovna posebnost. Samo se državom, kao oblikom ljudskog udruživanja i opstojanja, gdje su zakonitosti i pravičnost osnove društvenog ustrojstva, njenim građanima i narodima osiguravaju sigurnost i prosperitetna budućnost.

Mi ne smijemo potcijeniti činjenicu da postoje negativne politike koje siju sjeme razdora među građanima i narodima, i u našoj domovini i u inozemstvu. Zato moramo modelirati takve odnose u našoj državi da ona jednako privlači sve narode i građane. Povratak Bosni i Hercegovini kao istinskoj domovini svih naroda i građana naše zemlje najvažniji je bosanskohercegovački projekat 21. stoljeća. U taj projekat treba uključiti sve progresivne snage u državi i inozemstvu, ne samo političare već i sociologe, politologe, historičare, pravnike, teologe i druge naučne radnike. To je stoljetni bosanskohercegovački, evropski i planetarni projekat koji treba pokazati da ljudi različitih vjera, nacija i kultura mogu živjeti u jednoj slobodnoj i jedinstvenoj zemlji.

Poštovane dame i gospodo,

Postoje optimisti i pesimisti. Mi vjerujemo, mi smo optimisti. Nećemo se nikada umoriti od borbe za demokratsku Bosnu i Hercegovinu ravnopravnih građana i naroda. Naša država treba pomoć svih dobronamjernih ljudi u zemlji i van nje. Samo zajedno, kvalitetno povezani i organizirani možemo biti snaga koja gradi pozitivnu Bosnu i Hercegovinu na koju će biti ponosni svi njeni građani bez obzira na vjeru i naciju.

Hvala na pažnji!" (kraj)